

台

學

統

台學統卷三十二

黃巖王 蔡輯

吳興劉承幹校

性理之學二十 明儒四下

忠文方正學先生孝孺

下

遺文

侯城雜誠

凡三十八章明儒學案全錄今錄七章

學術之微四蠹害之也文姦言撫近事窺伺時勢趨便  
投隙以富貴爲志是謂利祿之蠹耳剽口銜詭色淫辭  
非聖賢而自立果敢大言以高人而不顧理之是非是  
謂務名之蠹鉤撫成說務合上古毀訾先儒以謂莫我

及也更爲異義以惑學者是謂訓詁之蠹不知道德之旨雕飾綴緝以爲新奇鉗齒刺舌以爲簡古於世無所加益是謂文辭之蠹四者交作而聖人之學亡矣必也本諸身見諸政教可以成物者其惟聖人之學乎去聖道而不循而惟蠹之歸甚哉其惑也

右第四章

蔡按務名之蠹似謂陸學訓詁之蠹則今之漢學是也而宋元之世已有之若錢時之書解王應麟之詩考陳應潤之易蘊等書是也然諸家之說亦多可采者固當並存而不廢焉耳且孔子言飽食終日無所用心博奕猶賢乎已況文詞訓詁其賢於博奕遠矣寧可以爲蠹乎

貧國有四而凶荒不與焉聚斂之臣貴則國貧勳戚任子則國貧上好征伐則國貧賂賄行于下則國貧富國有四而理財不與焉政平刑簡也民樂地闢也上下相親也昭儉而尚德也此富國之本也

右第十一章

爲家以正倫理別內外爲本以尊祖睦族爲先以勉學修身爲教以樹藝畜牧爲常守以節儉行以慈讓足己而濟人習禮而畏法亦可以寡過矣

右第十六章

孝子之愛親無所不至也生欲所壽凡可以養生者皆盡心焉死欲其傳凡可以昭揚後世者復不敢忽焉養有不及謂之死其親沒而不傳道之謂之物其親斯二者罪也物之尤罪也是以孝子修德修行以令聞加乎

祖考守職立功以顯號遺乎祖考稱其善屬諸人而薦  
譽之俾久而不忘遠而有光今之人不然豐於無用之  
費而嗇於顯親之禮以妄自誑而不以學自勉不孝莫  
大焉

右第二十一章

處俗而不忤者其和乎其弊也流而無立持身而不撓  
者其介乎其弊也厲而多過介以植其內和以應乎外  
斯庶矣乎

右第二十五章

尙鬼之國多病好利之人多貧禍不可避也利不可求  
也有心於避禍者禍之所趨嗜利無厭者害必從之故  
君子信道而安命

右第三十四章

人之不幸莫過於自足恆若不足故足自以爲足故不

足寶蓋易盈以其狹而拒也江海之深以其虛而受也  
虛已者進德之基

右第三十五章

深慮論一

慮天下者常圖其所難而忽其所易備其所可畏而遺  
其所不疑然而禍常發於所忽之中而亂常起於不足  
疑之事豈其慮之未周與蓋慮之所能及者人事之宜  
然而出於智力之所不及者天道也當秦之世而滅六  
諸侯一天下而其心以爲周之亡在乎諸侯之強耳變  
封建而爲郡縣方以爲兵革可不復用天子之位可以  
世守而不知漢帝起隴畝之匹夫而卒亡秦之社稷漢  
懲秦之孤立於是大建庶孽而爲諸侯以爲同姓之親

可以相繼而無變而七國萌篡弑之謀武宣以後稍剖  
析之而分其勢以爲無事矣而王莽卒移漢祚光武之  
懲哀平魏之懲漢晉之懲魏各懲其所由亡而爲之備  
而其亡也皆出其所備之外唐太宗聞武氏之殺其子  
孫求人於疑似之際而除之而武氏日侍其左右而不  
悟宋太祖見五代方鎮之足以制其君盡釋其兵權使  
力弱而易制而不知子孫卒困於夷狄此其人皆有出  
入之智負蓋世之才其於治亂存亡之幾思之詳而備  
之審矣慮切於此而禍興於彼終至於亂亡者何哉蓋  
智可以謀人而不可以謀天良醫之子多死於病良巫  
之子多死於鬼彼豈工於活人而拙於活己之子哉乃

工於謀人而拙於謀天也古之聖人知天下後世之變  
非智慮之所能周非法術之所能制不敢肆其私謀詭  
計而惟積至誠用大德以結乎天心使天眷其德若慈  
母之保赤子而不忍釋故其子孫雖有至愚不肖者足  
以亡國而天不忍遽亡之此慮之遠者也夫苟不能自  
結於天而欲以區區之智籠絡當世之務而必後世之  
無危亡此理之所必無者也而豈天道哉

深慮論八

驍勇之士多死於鋒鏑聰明之士多敗於壅蔽天下之  
禍常起於人所恃而出於意之所不虞其故何哉人可  
以有德而不可恃其有德可以有才而不可恃其有才



恃之所生禍之所萃也匹夫持挺而立於賁育之前賁育變色而不敢動非畏之也不知持挺者之勇怯也使  
人號於賁育之門曰我勇蓋天下賁育則笑而殺之耳  
何哉眞勇者固未嘗自恃其勇而驕人謂聰明者智足以盡萬物之變才足以通萬事之要而心常欲然夸辭  
不出於口怵色不形於面以旁求於當世之人故能謀  
者獻其謀有力者效其力凡一藝一能之士皆爲之竭  
盡而不敢欺之以其所處者謙所求者廣而不自恃其  
聰明也夫苟自恃其聰明未有不敗於其臣者也蓋恃  
則自盈自盈則恥聞過恥聞過則人不告之以善而見  
聞日狹矣見聞旣狹於是奸諛之徒謬爲卑諂以媚適

將順之於內而竊其威柄妄行賞罰於外是國家之大權潛移於下而禍亂乘之以起皆自恃其聰明之故也唐德宗之於盧杞宋高宗之於秦檜方其任二臣也自以爲聖賢相逢雖然其政而不疑其時雖告之以爲壅蔽彼固以爲妄言而不信矣孰知爲計之愚適爲奸臣之所笑哉然則其所恃以爲聰明者乃愚之甚者也故人君不貴乎智而貴乎不有其智不貴乎才而貴乎不居其才不貴乎聰明而貴乎取眾庶之言以爲耳目不如是而好於自用者未有不敗於壅蔽者也

蔡按莊烈帝之亡正坐自恃其聰明耳先生此言眞萬世爲君者之龜鑑也

君學上

人君不患乎無才而患恃其才以自用不患乎不學而患挾其學以驕人邈乎無爲澹乎無謀以任天下之才智而不與之爭能則功之出於人者猶出於己也恃其偏長小數以與臣下較銖兩之優劣使才智之士不獲盡其所欲爲是曷若不學之爲愈乎漢高帝椎樸質厚於學無所知然其聽言任人與知道者無異陳叔寶楊廣好自矜伐以爲羣臣莫己若原作出誤而其所以自負者適足以取敗蓋聖賢之學不傳人君旣不知爲學之道而復不能用其學譬之兌戈垂矢王者用之可以伐僭亂而狂夫得之或以濟其惡而爲盜豈戈與矢之不善

哉挾莫邪之器而不能用未有不爲大禍者也況彼之  
所得皆聖人之所棄者而恃之以驕人則適足以害其  
身而已學至于近世離而爲四言性命者得其本其失  
也過高道政事者得其用其失也過雜文辭之習華而  
鮮實制度之辨勞而少功人君欲如學士儒生兼窮而  
並索之豈惟勢有所不能而亦安暇事于此古之聖王  
爲學之道雖殊然其大要不過敬天仁民別賢否明是  
非數者而已而必皆以正心爲本正一心以對天下智  
者爲之謀仁者爲之守勇者爲之戰而藝能才美之士  
咸以其術自奮何患有所不知哉心舊作學非之不正而欲  
徒務乎學以之治身且不可而況天下乎

讀呂氏春秋

嘉業堂刊

呂氏春秋十二紀八覽六論凡百六十篇呂不韋爲秦相時使其賓客所著者也太史公以爲不韋徙蜀乃作

呂覽

案按太史公言不韋遷蜀世傳呂覽非謂徙蜀後作也

夫不韋以見疑去國

歲餘卽飲酖死何有賓客何暇著書哉史又稱不韋書成懸之咸陽市置千金其上有易一字者輒與之不韋已徙蜀安得懸書於咸陽由此而言必爲相時所著太史公之言誤也不韋以大賈乘勢市奇貨致富貴而行不謹其功業無足道者特以賓客之書顯其名於後世況乎人君任賢以致治者乎然其書誠有足取者其節喪安死篇譏厚葬之弊其勿躬篇言人君之要在任人

用民篇言刑罰不如德禮達鬱分職篇皆盡君人之道  
切中始皇之病其後秦卒以是數者僨敗亡國非知幾  
之士豈足以爲之哉第其時去聖人稍遠論道德皆本  
黃老書出於諸人之所傳聞事多舛謬如以桑穀共生  
爲成湯以魯莊與顏闔論馬與齊桓伐魯魯請比關內  
侯皆非其事而其時竟無敢易一字者豈畏不韋勢而  
然耶然予獨有感焉世之謂嚴酷者必曰秦法而爲相  
者乃廣致賓客以著書書皆詆訾時君爲俗主至數秦  
先王之過無所憚若是者皆後世之所甚諱而秦不以  
爲罪嗚呼然則秦法猶寬也

曹參

天下有不治之治而君子有無功之功非通乎道者不知也人皆知治之可以治也而不知求治而得亂人知有爲可以成功也而不知有爲適足以獲罪者功與罪固非人臣之所計而治亂之來不可不審也孔子曰如有王者必世而後仁昔甚疑之以爲王者之於仁宜其致之速奚待歷世而然哉及觀乎古之求治太急而致亂然後知孔子之言百世不能改也夫民新脫於創殘之中不休息之於無事而遽騷之以制度文爲之說使勉而從我則所以仁之者乃所以暴之耳東溺之人不可以近火久餒之人不可以飽食出溺而近火者必僵餒甚而飽食者必死且火與食者豈有殺之之心哉求

其速生乃速其死之道也故善治天下者先以不治治之曹參之相惠帝日以飲酒爲樂掾吏縱酺置而不問弛然不復加意於政教朝廷之閒幾於亂矣而海內以治何邪若參可謂知治亂之方矣秦之亡不在乎無制而患乎多制不患乎法疎而患乎過密使參而相漢復苛推而詳禁之是續亡秦之燄而熾之也故參寧受無功之名而不忍圖有功以禍當世則利澤陰施於斯民民安於漢而不離漢業藉以久遠者參之功也史以參比蕭何參亦自謂不及然何非參比也何智謀雖過於參而不學故干戈甫定而役民大治宮室其意務媚於主而無撫民之心參苟居何之任必不爲此以何代參



則何亦不能如參之明於國體而無所變更也漢苟無  
何則參之才足以立法苟無參而他有才者繼之則漢  
之法亂矣天下易得也而安之爲難安之猶原作易也  
而使民安於吾之法爲甚難參蓋嘗聞君子之道矣故  
其所爲近道如此而先王安民制治之大法固不止如  
參之所爲而已也於乎道之不行也久矣哉

棻謹按明建文之時苟以曹參輔之一遵太祖成法  
諸藩不削官制不更則靖難之師何自而起哉惜乎  
先生能言而不能行之也且漢初制度定於蕭何太  
史公亦稱何有術學曹參自知不及故守其法而不  
變先生乃謂何不學而非參比蓋失之矣知人則哲

論古猶然豈不難哉

婁敬

將興之主惟恐人之無言將亡之主惟恐人之有言天下固非一言所能興亡也求其興亡之故未嘗不自一言始以一言之善而取之天下之賢者必曰取善若是之周也吾奚爲而不言以一言之非而罪之天下之賢者必曰其諱過若此之甚也吾曷爲而與之言人皆欲告以善是集天下之善於其身也人不欲告以善是以其身推天下之善也有此二者而欲不興亡皆不可得也漢高帝以雄武之姿匿智下意以用當世之俊傑旣夷剪海內可畏者而廓清之亦可以少休矣聞婁敬遷

都之說卽奉宗廟百官而從之夫敬徒譎之虜布衣之人山東之賤夫耳語其辨不若陳陸語其智不若張蕭無夙昔之故左右之薦卒然脫輓輅而入見若涉無人之廷而論國之大事其術可謂甚疎其禮貌可謂甚野矣在廷之臣見其言論必且笑其妄而帝卽日下詔與之俱西如不能視者從相之言不能聽者觀人之指屈天子之貴斂絕世之威而惟敬之信當時不以爲輕動後世不以爲無謀而子孫果安其利是知善不必自己出貴乎能用人之善人君不必兼眾人之所長在乎因人之長而用之高帝之才非能遠過於人也智非能慮事而皆中也其不可及者有容人之量也唐太宗好學

有謀愈於高帝然所爲不及帝之盡善者量不若也能  
用魏徵之言智矣而幾致不能容徵誅蓋蘇文而伐高  
麗武矣終以不用道宗之言而敗太宗器量狹以能勉  
強從善故致貞觀之治及功成治定驕氣浸盛而無以  
制之故量盈而惡人之言古之聖人明道以勝私使其  
心海受而天覆用其善不計其他取其智不忌其名任  
其力不奪其功恭默南面若無能然而舉世之賢才咸  
爲之盡而莫敢負之夫能使賢才皆爲己用則其所爲  
與出於吾心何以異乎高帝嘗自謂能用三人傑故勝  
項氏三傑帝素所重者用其言爲甚易未足以見帝之  
美疎賤如婁敬而用之不疑此漢之所以興也

趙苞

趙苞爲遼西守鮮卑劫質其母而攻其城苞曰昔爲母子今爲王臣義不得顧私恩力戰破之母遂遇害余曰苞善守官矣然而未知義也千金與盈尺之璧孰重人必曰璧重而璧之櫝與千金孰重人必曰千金重璧固重於千金矣以櫝而敵千金不可也君固有重於親者親亦有重於君者使守一城而君在焉城存則君存城亡則君亡寇雖劫母以脅降吾盡死以存君可也苞之所守者漢之君恃此以爲存亡乎抑土地而已乎如土地而已土地者璧櫝之類也固不宜以此易母而不救也況善於謀者未必失君之土地乎彼鮮卑者衆多而

可以計取性貪而可以利誘其質母而攻城也所欲得者貨財耳能出數十萬賂之而以母爲請彼樂得吾之利未必不從者也苟利未足盈其心則求而避之彼雖得吾城吾徐以計攻之未有不勝者也不此之圖而使母死於寇手雖可以存天下君子猶不忍也況一城乎義者合乎道而宜乎人心之謂也不可以固而不知變也棄母以全城與全母而棄郡其非義則一然不若棄母之愈甚也權其輕重使合乎宜上不失親下不失職惟達於義者能之惜乎苞之不足以及此也

言命

方子灌疏於圃客有言祿命之術者方子曰若欲知命

之說乎窮乎天理之紀推乎日月星辰之行參乎氣運  
往復之端而後可以言命之癯而余何暇言之而若亦  
何暇聽之然吾方治蔬試與子言蔬可乎始吾與二鄰  
人藝蔬各數十畦其土同樹之時同蔬之種又同其一  
人耨之甚時溉培甚宜其蔬爲最盛藩籬不固一旦牛  
逸而踐之無遺植也其一人怠而不治時雨既畢草處  
其上而蔬伏其中萎翳隕穫無復生色吾閔二人者之  
爲葺吾籬使物莫能踰數耘屢溉俾蔬無所害故吾之  
植獨盛以大茲三者亦可以言命否乎世之敏於封植  
進取以致富貴而不虞外患者踐於牛者也不能自修  
而困賤貧者勝於草者也於命何預焉今徒言豐嗇禍

福制於天者有必至而不察修治警戒出於人者有未  
至天人之道離而命之說窮矣雖然此吾庶民之圃之  
喻也非王者之圃之喻也萬民者王者之蔬也九州之  
內王者之圃也仁義德澤其培植之具也政教刑罰所  
以剔汙萊而理之也夷狄盜賊踐吾蔬者也酷吏橫斂  
敗吾蔬者也聖人在乎上敗吾蔬者耘之除之踐吾蔬  
者斥之攘之而歲免其租月賜之酺同其好惡而恤其  
窮孤故其民多富而少夭好善而無殃斯時苟以六物  
推民之災祥豈無短折貧困者乎而卒不售者人事修  
而天莫之違也及其不然可以踐敗之者有所不修而  
可以培且溉者有所不行故其民多不能遂其性而樂



其生然其命之出乎天者豈無壽福康寧者乎亦卒乖戾者人事廢於下而天亦莫能違也故盛世衰世之民其命皆不可推宜然而然不然而不如此人所能知數之所該也不然而然宜然而否此理之所不可徵天地之所不能易而況於區區之數乎若行乎今之世其操術必精矣閔乎世之人必眾矣亦嘗見有宜死而壽宜賤貧而富貴如吾之所稱者乎苟有遇焉則幸以告吾將擷園中之蔬歌太平之盛以與子言命

策問

十二首錄其一

問孔子刪詩書斷自唐虞以下其事詳矣至於二帝三皇系之所自未嘗稍及之蓋慎其疑也及漢太史遷爲

三代世表乃稱堯舜禹稷契皆黃帝之後何所徵而言

歟

按本大戴帝繫篇

堯以二女女舜咨詢羣臣皆謂有鰥在下

曰虞舜堯未嘗識之也使舜而與堯同族堯治天下以親九族爲首其有弗識之者乎遷謂黃帝生玄囂玄囂生螭極螭極生高辛高辛生放勳黃帝生昌意昌意生顓頊顓頊生窮蟬窮蟬生敬康敬康生句芒句芒生螭牛螭牛生瞽叟瞽叟生舜自黃帝至堯四世而至舜乃八世其世數之疏數姑未論烏有聖人而娶四世之祖姑者乎舜百有十歲而崩時禹年七十

按年固未耄老九十

也而遷乃謂禹爲昌意之曾孫則於堯爲從昆弟於舜爲高大父行矣安有四世之從孫年有百餘歲而傳天

下於四世之高祖者乎黃帝至夏桀二十四世至湯一十九世湯又傳二十九世而爲紂二代總之千一百二十年而武王乃以黃帝一十九世孫而代黃帝四十六世孫紂何夏商周世次久遠不同至此乎二帝三王之道學者所宜盡心而其事之難知有如是者皆不可不講也願聞所以折衷也

按此篇蓋據史記三代世表以發問

### 文會疏

伏以道術之分九流儒者實禮樂之宗主浙水之東八郡金華乃文獻之淵林在天墮爲婺女之墟於墳籍資賢人之聚自宋南渡有呂東萊繼以何王金許眞知實踐而承正學之傳復生胡柳黃吳偉論雄辭以鳴當代

之盛遂使山海之域居然鄒魯之風天寶啟之世有作者惟我朝創業垂統之初載得華川潛溪之兩公或以誠篤博大鎮朝廷或以忠節剛方聞夷夏修九十三年之元史爲百千億載之成書雖盛衰榮辱所遇難齊而道德文章俱垂不朽繼其後者夫豈易哉恭惟仲繙先生推其學則潛溪之門人論其家則華川之愛子耳濡目染於斯道斯文之懿不出於戶庭而得之心解力行於厥父厥師之傳能紹其箕裘之業矣是以名播萬里來觀王國之光經授諸生聿佐郡庠之教夫成都自文翁興學不乏楊馬三蘇之才況賢王尙文已成周召二南之政教化行而風俗美固曰本於人君師道立而善

人多是所望於吾子尙念淳熙乾道之大統皆振民育德之宏規夫何近代以來徒爲謀利之具慨想一時之羣彥鮮不隨波而逐流苟非振古之英賢孰克任重而道遠本六經而敷五教慎無負於孔孟在天之靈備九德而配八元庶有待於唐虞致君之士謹疏

按觀此可略知金華

文獻之傳

與士修

許繼字

希魯來知足下已就校師甚以爲喜足下行方志果樂古道於今之世雖得崇位不置毫髮於心於校師乎何有而僕喜者非爲足下蓋喜斯道之有助鄉學之未絕也學術之盛衰非有述焉則不明非有繼焉則不傳自

古志義宏大而名不立者何限蓋莫爲之繼也吾鄉自羅適先生至今且四百年奇偉之士不爲鮮矣其大者載國史小者亦皆自有論著在當世莫不燁然驚動於人而今乃泯泯盡不幸其子孫不能守遂至湮滅而後生之識其姓名者未甚眾豈非可惜哉僕以爲前人之弗傳後死者之責也故竊欲有所紀述而聞見淺狹不能悉其事嘗懇懇爲人言之苟且者多有志好古者少卒未有知而和之者以爲宜然者獨足下耳是以往者曾致書足下時足下窮居無異於僕言發而莫之從意鬱而莫之達久而不報也固宜今足下爲人師從遊者皆邑之秀民秀民多於里黨習知而熟稱者也足下試

坐召而問焉取其所著者而觀焉從其子孫而徵焉得其實則以示僕某雖文采不足希古作者然使執筆從足下後豈皆不及近代之士乎勒成一書藏之學宮俾人人有所攷法知古先之賢哲益思修己治人之道其功用甚大足下毋辭且讓爲也古人不苟著書冀行道耳今卽得位亦未易行況足下不以貴賤動心者足下惟以文辭自見於世亦所以不朽矣僕新自婺歸雖有侍奉之驩然與朋友相遠殊悶排不自勝閒暇能一見錦齋

與王修德第四書

稍節

某向以安居飽食無毫髮及物之益妄不自度欲蒐輯

邑里遺事成一小書上以昭揚賢士君子之潛德下以爲勸於將來俾後生小子有所慕而爲善蓋舉古閭師黨正之職爾非敢妄竊褒貶之柄而冀其傳也夫古人之傳世者豈偶然哉其事足傳矣其辭不能發之則不可傳其辭與事稱矣作者之道德言行不足取信於世則雖傳而人不之信今縱使有卓然宏偉可喜之績付之無聞之人著以不文原作聞誤之辭亦恐其卒歸於泯墜而況者舊淪喪之餘聞其名者不知其事言其事者莫考其實而欲取信於無窮焉可冀乎是以嘗爲吾兄言其故而久未成書者此也忠節孝友篤行之人既各爲之傳其他文學貴顯者欲析而二之則其跡雖有隱顯



之殊而其志行學術初不相遠以仕者爲宦達旣非所以尊之俱目之曰儒林則亦有以政事稱者今不敢僭爲區別通謂之先達列傳但以時世分先後而不以仕否爲重輕竊意如是庶乎不失其序而無抑揚去取之嫌若夫治邑之大夫其有惠政及民如陳長官胡汲仲亦不可使其遺事日就亡失今爲立良吏篇以處之凡名姓稱於吏民之口者皆得附見焉然宋數百年厯賢令丞多矣世絕無所傳聞往時紀風土者俱棄而不錄今亦無所徵而爲之立傳使其人皆若洪忠宣者由是而興處顯位立名績於天下固不待此而傳若不幸官僅止此疲其心思智力斬一聞於來世而又不可得豈

非可恨哉前所問數公不知曾得其事狀否第宋末爲  
文者矯陳腐之過喜以新奇亂事實如君家太常固未  
免此近訪得太常爲

原作及

鄭龍圖墓銘至於官位亦以

他名易之讀之殊不曉其所居爲何職所行爲何事惟  
視之太息而已文之爲文豈以此等新奇爲好哉真不  
識其何說也夫文辭於學者至爲淺事以道言之正不  
必求其新奇惟發人所未嘗言之理則可謂之新非眾  
人思慮之所及則可謂之奇如孔子之大傳有聖人以  
來未之有也子思之中庸孟子之七篇有諸子以來未  
之有也周子之太極通書張程之西銘易傳以至朱子  
之所論著有經說以來未之有也以其古所未有謂之

新奇或可也然聖賢豈務爲新奇哉其道明其德盛其言不得不高且美耳故夫外道德以爲文辭者皆聖賢之所棄者也近時自悼少時狂謬所好所業者不過記誦文辭而記誦不能博文辭不能工則又僅得其最陋者以是空言寢多絕無自得之味思一屏絕之而以顏曾所以自治者治其身爲日稍久覺向時過闕愈眾苟不早悟其非幾老死饕餮中與蚊蚋俱盡而不知天地日月之爲大深可懼也吾兄前書有學無端緒之歎其見進學之篤近世之淺陋者正坐易足而自高耳未能執筆已斥顏柳不知晉人書法未能遣辭已呼蘇子瞻爲阿軾欲毀棄其文於孔孟之書未嘗詳讀旬日已指

程朱說經之誤紛然辯駁不自媿恥此其人豈復知有天地日月也哉吾輩當深以之爲戒求古人崇大之域而趨焉可也所欲言者無窮不爲吾兄發之則無所發矣然不能詳略道一二

與王修德第五書

稍節

邑志曾修得事略九篇惟鹽算魚課未知其數兵哨

原作

稍連年數目當問之兵房識文案者儻耳目所及有可

問者煩問之諸人傳分忠義孝友篤行貞節四品皆起首矣有可入者須示及縣先達尤卓卓者公家瓦全墓銘外有行狀否銘文晦澀疎略不足考其本末雲壑事問兩者宿索之同姓菊田有詩名不知有子姓事實否

他若山南樗園愚可學可兄弟及應伯章諸公皆當時有名士今皆不見其後人言其遺事令人慨然望一一遇可語者問其詳相報富貴而磨滅者不足道若前數公用心期望與世懸絕矣使其同歸於泯沒豈非吾人之責邪故特奉告不知重到邑時尙未行否

按據此二書先生嘗修寧海縣志未知成否然佚久矣

又按與鄭叔度書欲修邑先達事行爲人物記卽此書也

與鄭叔度第一書

稍節

僕頑鄙之資無與於人少之時鄰里見其癖於學多指

目以爲迂雖姻連密邇者皆然也獨先人見奇以爲可教及先人出官於外攜以自隨愚有所述多出以示人稱譽如儕輩先人之意自謂庶乎見其有成也不幸而遽棄以死僕日夜痛恨恐卒無所成流於庸人以虧先人之明故思自奮拔立名以自見於後世退而深惟有祖母存諸父伯兄可以養矣夫子欲繼父遺業揚先人名祖母所喜諸父伯兄所欲也烏敢辭讓焉遂勉而從學求學者舍嫠無所往故至於足下之鄉學於太史公而後知爲學之道大也聞太史公之言而後知天下之鉅人也嗟乎太史公之愛僕足下知之公之知僕惟僕自知之雖號知某者皆不知之也公嘗爲僕言聖賢之

道所以處僕者至厚矣僕雖非其人然頗識去就知好  
尙安敢忽哉知人天下之至難知己者尤古人所重也

僕嘗怪以魏舒之賢以其季父知人之明而終身不知

之使之守確

事見晉書  
魏舒列傳

夫人蘊輔相之才而其季父日

與之接其容貌辭氣豈無少異於人乎猶不能知之則

夫俊傑之士非恆人所知亦明矣顧智者乃能察之耳

恆人恆多智者恆少世而遇一人愛賞拔於羣笑之中

喜其可既邪古人之重知己誠有以也僕於太史公雖

欲不思其可得哉相與處也而樂相乖闕

原作闕

也而悲

謂非人情可乎惟足下知之耳足下之待僕雖昆弟何

以過而僕於足下亦無所不盡然僕之愚何益於足下

足下之爲賜則旣多矣僕嘗謂辭令趨走非所以報朋  
友故受人之惠未嘗以語言謝之惟存之心繼之以不  
忘有所成立則報之未艾也此僕固陋之私也足下其  
謂然乎足下清明慈良有君子之器又篤學不倦其至  
於古人也奚禦願益加之意以果所望僕近辯正周禮  
始成書欲修邑先達事行爲人物記無相輔者恐未易  
采錄相見當在明年久不得太史公動靜遣人送書聊  
具一二

荅王仲縉第三書

俞兄子嚴至得書及所作文序啟封伸紙立捧細誦意  
厚而誠義純而達不自知手之不釋而心之暢懌也世



人之於文誰不爲之至於求其可誦者何其鮮哉蓋不  
得其塗故也士之患多厭常而喜怪背正而嗜奇用志  
旣偏卒之學爲奇怪終不可成而爲險澀艱陋之歸矣  
且學奇怪者以其美也而奇怪亦非古人之所尙也文  
之古者莫過於唐虞三代而書之二典三謨禹貢胤征  
以及商周訓誓諸篇皆當時紀事陳說之文未嘗奇怪  
詩三百篇亦未嘗奇怪春秋書當時之事雖寓褒貶之  
法於一言片簡之中亦未嘗見其奇怪禮經多周漢賢  
人君子所論次其言平易明切亦未有所謂奇怪至於  
盤庚大誥其言有不可曉者皆當時方俗之語亦非故  
爲是艱險之文也然則嗜奇好怪者果何所本哉苟謂

於司馬遷班固則遷固之書有質直無華如家人女子  
所言者唐之文奇者莫如韓愈而其文皆句安字適初  
不難曉宋之以文名者曰歐陽氏曰蘇氏曰曾氏曰王  
氏此四人之文尤三百年之傑然者而未嘗以奇怪爲  
高則夫文之不在乎奇怪也久矣惟其理明辭達而止  
耳而世顧他之焉者猶之迷人醉客不問塗於大道肆  
意徑趨是以卒不免入乎荆棘之場墮狁之居終弗獲  
就乎大道也今足下之所爲非特得其塗而已而又有  
始終焉有理趨焉苟益修於不弛潛其源而導其波將  
見汨汨然來而不止繼乎待制君之聲烈可望矣昔在  
朝廷爲文者非不多而人惟推太史公與待制君蓋文

之法有體裁有章程本乎理行乎意而導乎氣氣以貫  
之意以命之理以主之章程以敷之體裁以正之體裁  
欲其完不完則端大而末微始龍而卒蚓而不足以爲  
文矣章程欲其嚴不嚴則前甲而後乙左鑿而右枘而  
不足以爲文矣氣欲其昌不昌則破碎斷裂而不成章  
意欲其貫不貫則乖離錯揉而繁以亂理欲其無疵有  
疵則氣沮詞慙雖工而於世無所裨此五者太史公與  
待制君能由其法而不蹈其弊而務乎奇怪者皆反之  
此世之公言所以推諸此而不歸原作居乎彼也斯文者  
造化之至理寓焉人患不能造其極耳苟造其極決不  
可泯滅有志者在乎自力而已僕所志尙有大乎此者

省事者少不欲與人言雖應時作文又恐人以文人相  
謂亦久不喜談政足下愛我之深念我之篤聊以此復  
命子嚴亦甚可喜須時相與議論有益也

蔡按此因王仲播爲先生序遜志齋集因答書與之  
論文其爲文之宗旨具見於此矣

### 答胡懷秀才

往年在浙東獲交才俊閒其最善者眉山蘇太史平仲  
臨海葉刑部夷仲浦陽鄭楷叔度天台林右左民趙象  
伯欽陳叔英元采王倚修德日夕相與周旋論議倡酬  
往復沈潛乎天人之奧博觀乎興廢之理追琢乎行業  
而浸灌乎文章意氣孚洽無所覲慕體不待梁肉而肥

心不待絲竹而暢十餘年來亡落者數人餘多散處他所然猶時得以書疏相講切當憂而遇笑方思而暫釋未甚於窮獨也及居山南木石之與徒猿獠之與儔心欲言而口莫與談足欲行而物莫與娛諸生講授經義畢輒冥目危坐或取古書緩讀徐吟閒有所得無從告語惟仰觀得漢默默悟遣郡府以朝命燕集不可拒往就末座官僚強飲以酒譁詞盈耳優戲在前未嘗爲之啟齒一笑頗自意無復追曩者之歡矣去冬之長安見唐愚士爲之欣喜又於愚士舍見足下文章益覺胸中慰悅然未知足下之深也今乃辱惠書千餘言陳述反復筆勢流動上思古人下慨當世偉然有奇丈夫之風

自入秦且三年未曾有一人以文相覲豈意乃得之於  
足下乎撫卷熟覽出入懷袖數日不能舍儼若重見往  
時諸君而接其聲容也文章於士子最爲末事然非有  
得於古聖賢之意者不能世之學者眾矣其用志不專  
探索不精聞見不博攻習不久而能得聖賢之意者無  
有也是以吾少而好觀人文非止以其文蓋將因其文  
而察其所存與之共進於斯道也覽足下之文於道信  
有志矣然而屢稱古之文人則是所向慕猶有所偏也  
賈生韓退之年三十餘已卓卓然樹立信如足下之云  
然使斯二公者得聞聖人之道而進於曾冉之列則其  
賢當何如哉

案按二公雖未敢與曾冉同列而於聖僕  
人之道皆嘗有聞先生此言似稍過矣僕

鄙陋自度不足班古人而年長來閉口不復及天下事  
於政教舉措得失漫不復解而篤信六經有所爲也  
以之爲權衡有所疑也以之爲著龜性原作惟愚不足達世  
之機變甘以鈍拙自守人見其如此亦多竊笑之又素  
伉直不耐與富貴人仰俯有勢位者或欲招致聞其不  
善諂屈亦往往不合欲如賈生之亟談世事固不能如  
韓子之汲汲於得位尤不暇也足下乃以賈韓相擬烏  
可當哉然賈生之勸漢文以寬大韓子之酷排異教導  
孔孟竊有志焉使天或將庸斯人明斯道他日倘萬一  
有成未可知也而不敢望也凡人當少壯時志意才氣  
百倍及年益增力益衰則沮謝隕穫原作有悔往歎今

之心如買之長沙韓之潮陽其英銳之姿亦少減矣聖  
人大賢志氣隨日以強德業與時而加故有進而無衰  
既老而彌明僕之得乎天者未可知己之可勉者則猶  
有可進之地安知果不若足下之所期哉僕今三十六  
固爲未衰足下少三歲使三歲之中日有所得其於追  
僕而出其前猶騁駛驪蒲梢而逐伏櫪之驚馬特易易  
耳所願者先乎道而後乎文修飭其身心而無預斷乎  
聲譽則僕之所見將有大過於今者矣喜慰其可量邪  
比懶作書尤不敢論古人於足下有言不能默默然世  
俗之難言也久矣足下其勿以示人恐眾人之竊笑也  
答俞敬德第二書 稍節



某六七歲時初入學讀書見書冊中載聖賢名字或聖賢良相將形貌卽有願學之心每竊寸紙署其名與同輩諸學子顧視而指麾之父兄雖加呵禁不止也旣而年十歲餘漸省事見當今之爲仕宦者不足道以爲聖賢之學可以自立外至者不足爲吾輕重也遂有慕乎道德之心又四五年侍先人北游濟上歷鄒魯之故墟覽周公孔子廟宅求七十子之遺跡問陋巷舞雩所在潛心靜慮驗其所得慨歎以爲彼七十子者縱顏閔未可幾及其餘若樊遲冉求輩使學之同時豈皆讓之乎迨今又五六年閱理滋多約心愈久始知古人未易卒至每興傷今崇古之思發爲言語道政事必曰伊尹周

公論道德必曰孔孟顏閔寢而思者此數君子也坐而誦者此數君子也猶恐流於過高如古狂人而不適於用是以深自制抑若中無絲毫學者見庸眾人猶且畏而卻避之況大賢魁儒如曾子子思孟子互千載而特立者焉敢覲其萬一哉足下乃以某爲可庶幾而至此言一出惟恐流俗將以笑某者笑足下矣然足下無或怪其笑也孟子曰君子之所爲眾人固不之識屈原曰非俊疑傑庸態然也近有人聞某狂言輒頓足撫掌如聞怪聲且欲來矚形貌果類古人否所親者以告某笑應之曰形貌與今人不異但心似古人耳所親者亦大笑要之此事不必與流俗爭但汲汲力求千載以上之

人爲師以俟諸百世之下知不知不暇問也

答金景文 稍節

吾郡聞人三百年來如黃巖杜清獻公鄞邑葉信公學術事業著於國史其餘卓卓者數十人類非近世之士所及至於僕輩而言學於諸公之前真可恥矣凡今之稱引才藝以夸世俗者皆可恥者也然古事日遠後生無從知之僕近者嘗欲爲一書紀載前人行業使隱沒微晦之跡昭然布聞耀人耳目以爲州閭法式事在國史者已錄得數卷不幸棄遺於太史者甚眾欲求其子孫而耆老淪亡無所考質夫人劬一世之力以成其身顯名譽於當世蓋選千萬而二三者也生乎其後者不

能爲之發明以表揭其志義願使與庸夫恆人同於泯滅不亦違天道而負公義乎僕文采雖不足取執筆憤悱旁求博討執事年高多聞於嘉言舊事必能記憶幸詳教我府學赤城志并望見借當令人鈔錄送還羅先生適縣志不載其行惟云事見鄒諫議浩送董遵逸序及州學三先生祠記秦少游所作生祠記少游文已得之三先生祠記學中必有煩令善書者錄示僕觀古豪傑之士居乎位必有益乎位居乎鄉必有益乎鄉如使因循乎眾人之中於事無所補則與眾人奚擇焉自京師歸又五年矣於聖賢之道未能有絲毫之補欲成小書以贖前過執事以爲可否乎

茹荼齋記

一五卷二二二

嘉業堂刊

予生七齡而喪母夫人又五年而繼母復卒又七年先公奄捐館舍蓋二十而丁三艱質素薄苦多病重之以悲哀割心摧腑殆不能人竊自思悼當世之人有垂白而有父母者焉有五六十而有者焉有都崇位立大功而及養者焉不幸者或偏存怙恃焉則以爲大戚矣或四十三十熒然爲孤則不自比於人矣若予者眇在童孩之中而尊親頓已凋逝雖欲自名爲人尙敢望耶是以日原作自忽忽而不寧食入口而不知其甘念昔人之言以遭喪爲荼毒可謂甚矣因闢一室以居而以茹荼名之旣以志其悲苦亦以自勵也追憶少時狂僭甫有

知識輒欲以伊尹周公自望以輔明王樹勲業自期視  
管蕭以下蔑如也遊行四方考徵生民之利害揣度風  
俗之盛衰綜覈古今治亂之由至詳矣將求所以試之  
而復自疑

原作淺似誤

以爲古之聖賢君子成大業立大功

者天必俾之先受天下之大患涉天下之至苦故其志  
堅凝而不懾氣充盛而不衰智慮明而措置安不如是  
不足以成之也數年以來奔走屈抑於塵埃中爲奴隸  
之所訾叱庸夫俗吏之所困辱心私自喜聞以告於先  
公先公忻忻焉如不知其駭陋蓋深意屬之不幸寡佑  
先公遽棄以去嗚呼尙忍言邪天之苦予一至此邪苟  
不自勉何以白先公於地下邪然思過而忘備處安而

縱逸者恆情之難免也余也日處乎斯室而瞻斯名使  
中心常若寢乎苦塊之上立乎先公之前而與伊尹周  
公之徒相講說時乎遇則有以償昔之願否則折衷一  
家言以輔翼羣聖人之道以自立於萬世庶幾不繆先  
公之志也乎雖然是亦徒耳先公不可得見矣貴加乎  
眾庶澤被乎生民人以爲榮則有矣而豈足以追父母  
之樂哉茹荼之名雖終身用之可也

傳經齋記

世之稱治者二帝三王而已其詳不可得而知宏綱大  
法所以相傳而不泯者惟羣經之存是賴然安在其不  
泯也經者治天下之具也豈直文辭云爾哉自秦火之

餘老儒碩生補緝扶衛專門殊軌授諸其徒所從事者

止乎訓解辯義至於輔

原作補

世善俗之道蔑如也由是

世之君臣指經爲浮言而英才雄辯之士顧棄去不業而一攻乎文辭之學帝王之道頽然墜地而生民亦大困矣嗚呼聖人之經豈固如是乎如是者非經之失也傳之者無其師受道者非其人也某少則嗜學竊有志於斯道自從先公學經匪聖人之言不敢存於心匪生民之利害無所用其情恨未及卒業而中丁憂患近年始就太史公學於浦陽然後知經之道爲大而唐虞之治不難致也知古今之無二法而世之言學者果不足以爲學也蓋太史公受諸經於聞人君夢吉吳萊先生



黃文獻公潛出而侍從帷幄輔導儲后雖未嘗得佐治

之位以盡其設施然所陳說

或誤作設

皆二帝三王之道其

功德陰被乎生民者厚矣及致其事而居於家以閑淑  
來者爲志雖某之鄙陋亦得與聞斯道微之於性命之  
理明之於禮樂刑政之要苟有得者無不以言某雖非  
其人不足以承其緒然安敢忘所自哉經之無用於世  
者二千餘年矣某竊嘗痛焉苟知之而不得用於世者  
天也身尊顯而不以行者不仁也謂時君不能行者不  
忠也謂斯民不可以道化者至愚也謂諸經爲不足法  
者不知爲學者也某旣幸知之矣儻或有得乎天而見  
於世自茲以往皆公之賜也其敢忘乎其敢多讓乎於

是名受業之齋曰傳經以志其所始

遺詩

舟中呈同召葉夷仲林公輔楊大中陳元采

本乏適時用誤爲當世知進身媿蹇拙退處乃其宜何  
意承寵光使車忽來茲靡靡踰南國秩秩錫多儀嚴程  
不可稽王命自有期親愛俱在眼弗獲顧我私聖猷同  
山岳微忠劣毫絲黽勉諒何補徒興千載思

上巳約友登南樓

生意忽滿眼不知春淺深良朋曠嘉會濁酒難孤斟迢  
迢城上樓高朗宜遠臨曷不一舉趾縱望淵與岑逍遙  
羣動表舒豁萬古心古人已寂寞繼者應在今蘊真有

至樂外慕非所欽  
疇昔舞雩詠千秋  
虞氏琴窮達各有  
適宇宙流遺音景  
風生穆清佳趣溢  
魚禽願言領眾妙  
無爲鬱沖襟

題嚴子陵

敬賢當遠色  
治國須齊家  
如何廢郭后  
寵此陰麗華  
糟糠之妻尙如此  
貧賤之交奚足倚  
羊裘老子早見機  
獨向桐江釣煙水

題李白觀瀑布圖

天寶之亂唐已亡  
中興幸有汾陽王  
孤忠匹馬跨河北  
手扶紅日照萬方  
凌煙功臣世爭羨  
李侯先識英雄面  
沈香亭北對蛾眉  
眼中已見漁陽亂  
故令邊將儲虎臣

爲君談笑清胡塵朝廷策勛當第一珪組不敢縻天人  
西遊夜郎探月窟南浮萬里窮楚越雲山勝地有匡廬  
銀河掛空灑飛雪醉中信馬踏清秋白眼望天天爲愁  
金閨老奴污吾足更欲坐濯清溪流英風逸氣掀宇宙  
千載人間寧復有夢魂飛度南斗傍笑酌廬山一卮酒  
雲松可巢今在無九江落照連蒼梧欲從李侯叫虞舜  
盡傾江水洗寰區

承宜隱友兄同還精舍賦短律五首爲別

錄一鄭好義號宜隱

千載康成學羣賢惜異時典章秦火盡禮樂漢書疑聚  
訟吾何敢承家子莫辭從來參筆削萬一補民彝  
二月十四日書事二首

斧展臨軒几硯閒春風和氣滿龍顏細聽天語揮毫久  
攜得香煙兩袖還

風軟彤庭尚薄寒御鑪香繞玉闌干黃門忽報文淵閣  
天子看書召講官

感舊九首

雄文不見林公輔病眼荒荒何處開將相亦輸天上樂

多情莫向世閒來

蔡按此時公輔已  
歿故後二句云然

杯酒論心有幾人天台張穀舊相親近來詩句多奇語  
書比藏真更絕倫

精通入法楊文遇暗誦五經陳用中揮翰天庭應獨步  
忍飢村巷欲成翁

翰苑暫歸盧太史銓曹已失鄭郎中名高金殿龍頭選  
夢憶蒼山馬鬣封

林鄭爲文學我家波瀾議論闊無涯兩年不見何時到  
望斷嶠江八月槎

博陵博士才華盛漢上畸人道術卑欲寄一書無雁過  
相期千古只心知

立言溫粹懷陳宋肆筆縱橫憶鮑岡若使韓門加接引  
未容籍湜獨升堂

王郎遠逐雲中戍許子俄爲地下郎重訪舊人尋舊跡  
嶺雲溪月總堪傷

多病深知志術荒中年苦復厭文章欲圖天地相終始

肯與時人較短長

聞盧原質表兄廷試探花郎授編修喜而寄之

奉天殿上榜初開共賀江南得秀才好是青蘿居士說

近來文運屬天台

青蘿居士宋濂自號

談詩五首

舉世皆宗李杜詩不知李杜更宗誰能探風雅無窮意  
始是乾坤絕妙詞

前宋文章配兩周盛時詩律亦無儔今人未識崑崙派  
卻笑黃河是濁流

發揮道德乃成文枝葉何曾離本根末俗競工繁縟體  
千秋精意與誰論

天庥諸公製作新力排舊習祖唐人竊豪未脫風沙氣  
難詆熙豐作後塵

萬古乾坤此道存前無端緒後無垠手操北斗調元氣  
散作桑麻雨露恩

立春偶題

二首錄一

萬事悠悠白髮生強顏閱盡靜中聲效忠無計歸無路  
深媿淵明與孔明

蔡按此詩蓋建文四年  
作先生之自訟切矣



台學統卷三十一

台學統卷三十三

黃巖王 蔡輯

吳興劉承幹校

性理之學二十一 明儒五

處士葉拙訥先生黼

赤城新志遺逸葉黼字士冕號拙訥太平人博學通經史真知實踐以古道自持貧而好施授徒所得束脩恆均諸鄉族之貧者嘗折衷學庸眾說摭取朱子語錄及黃超然通義相發明者附周易本義繕錄未終而卒

葉良佩七先生傳葉拙訥先生名黼字士冕邑之溫嶺人博通經史好古力行嘗受業於郭文康得饒陽性理

之學隱居教授其徒常數十人其教以孝弟誠敬爲本  
而以文藝次之家徒四壁立然性好施與授徒所得束  
脩計八口經費外卽以均諸鄉族之貧者以爲常卒後  
四紀從祀鄉賢祠子原徽號素軒原紀號一得皆能以  
文學世其家時號二葉云

拙訥葉先生墓志銘

吉水劉儼宣化撰

赤城後集二

黃巖有處士曰拙訥葉先生卒且葬嗣子原徽以其門  
人蘭陽司訓應君志和所述行狀介武庫主事章君仲  
寅謁余銘章君具道先生之學精修篤行上沂濂洛之  
淵源里俗爲之不變於乎世有斯人也使有之恨不能  
起之與游銘奚可辭按狀先生諱尙輔字士勉拙訥其

別號也其先閩人五季時避亂徙黃巖遂占籍焉六世祖檜居州之米陳務曾大父養初贈江浙行樞密院經歷事見元翰林承旨潞國公張翥所撰墓銘大父道祐避地溫嶺隱德弗耀父希性號東澗學行並著邑志母陳氏先生生有異資夙抱大志凡厥猷爲輒以古道自期其父家居教授先生承其淵源自得之學敦本黜末一以真知允蹈爲務讀書以四書六經爲本下及諸子百家之言靡不旁搜博覽以極其趣雖有疾病不廢呻痛言雜莫之辨晚年益精於易清修苦節造詣日深措諸行事惟義是從視世之紛華富貴漠然無所動於中此先生之學也事父母鞠躬盡瘁養志無違居喪葬祭

及歲時奉先之儀一遵文公家禮事兄愛敬兼盡終始  
一致弟尙夫鰥且獨先生與之同居共食怡集終身命  
少子原紀爲之嗣兄女少孤育之如己子旣長具粧匳  
嫁爲士人妻平居無情容御下無疾言遽色暇則端坐  
一室左圖右史雖盛暑衣冠不苟去身家法嚴正內外  
肅如也此先生學之驗於家者也其遇宗族姻黨歡然  
有恩燦然有文不以疏遠而廢貧者周其急弱者植其  
生老而無居者迎以養之少而失學者收以教之葬其  
不能葬者十餘喪鄰里以急告亦振卹之恐後先生居  
貧而好施與如此是以門徒雖眾而贄見之儀一毫不  
爲己有衣麤食糲泊如也先生師道尊嚴循循善誘名

家右族不得師事之則有慚色擔簦負笈而來者戶屨可束先生答問亶亶皆隨其材而造就之凡經指授蒙品題者罔不思自激昂以拔於流俗至於接人禮恭而氣和語子以孝語弟以悌語居官者以忠愛語理家者以勤儉詞婉而確情真而懇翕然有足動人者雖有暴悍一接言語婉汗浹背亦欲有以自新此先生學之施於人者也先生自少有目眚無意仕進屏去場屋之文大學中庸則集諸家之說而折衷之以資學者周易則采摭朱子語錄及黃超然通義之言可以相發明者附於本義繕錄未終而先生沒其藁多殘缺先生居喪時盡節家禮之要行禮者便焉平生喜爲古文詞一主乎

理典寶雅贍有粟菽之味詩尤冲淡清逸追配古作者  
皆有稟藏於家此亦莫非先生學之所著也先生生於  
洪武辛酉八月初四日卒於宣德辛亥四月十八日享  
年五十有一配李氏子男四人長承基次承統早卒次  
原徽原紀俱好學克世其業女二人皆適於士族卒之  
年十月廿三日甲寅葬於溫嶠山之原吁先生之學質  
而通博而要刑於家族著於鄉邦彰彰若是使天永其  
年昌其施有功於後世爲何如耶孔子曰書云孝乎惟  
孝友于兄弟施于有政是亦爲政先生其庶乎又何憾  
焉是宜銘銘曰

塵世紛紛名利途雞鳴而起爭奔趨先生視之猶泥塗

斂迹不出恐沾汚俗學之弊陋且拘坐看大道生蔡蕪  
先生義利分毫銖胸藏萬卷如石渠蘊爲德行碩且膚  
卑不同俗高不迂發爲文章德之符工不嫵媚光不枯  
天爲吾道生眞儒握瑜待價而沽諸四方負笈來學徒  
坐擁皋比講唐虞身雖云晦道乃腴絲絲慶澤遺諸孤  
嗚呼先生已矣夫有封若堂嶠之隅貞珉深刻無媿辭  
過者爲式瞻範模廉頑立懦敦薄夫

拙訥先生葉公贊

謝鐸撰

太平縣學鄉賢祠記

斯學之大體用二者窮善其身達則天下悠悠九州我  
懷我人誰哉利物忘己之貧嗟公此心窮力所至彼何  
人斯而在高位公拙以訥公質近仁公學不媿饒陽之



門

遺詩

中秋月蝕次韻答應谿南

徒把臣全古太阿青真無路護霜娥忍令怪物來吞噬  
愁對清光漸滅磨玉斧難修今夜缺褐衣空憶舊時窠  
一年好景成孤負奈此西風桂子何

臣全謂盧仝褐衣用昌黎毛穎傳衣

禍之徒指月中兔言

借韻答應谿南

曾期滄海探明珠客邸深懷會面疏倚徧石闌花落後  
眠敲山枕酒醒初化龍未合雙神劍烹鯉空懷尺素書  
回首東風春又晚囊書何日返幽居

遺文

趙氏祠堂記 赤城後集八

朱考亭祠堂之制士庶之家可立也其所以報本反始之心尊祖敬宗之意胥此焉寓所繫匪輕人之開業傳世者欲守名分聯族屬其可不以是爲先務攷諸禮經而不背揆諸世變而適宜參諸人心而允協誠萬世可常守之宏規也趙氏祠堂官嶼趙巖維石之所創以奉其先世神主也趙氏世爲士族其先居越之蛟井至後周銀青光祿大夫諱仁暉者始遷黃巖之洪洋源深流永寢以繁衍元季兵燹其十五葉孫東庵處士諱明祖者又自洪澤再遷同邑之官嶼官嶼之原趙氏世有祖

墓在焉助教世顯宋贈大夫允濟武翼大夫亥保義耶  
桂孫其墓皆在茲原之左右故處士於此築室以居至  
維石又四世矣舊無祠堂卽所居東房以爲藏主之所  
湫隘不足以容眾聚立維石謀諸季維陽氏曰我家世  
以孝義稱至我不令子孫乃不克營一祠堂何以承其  
家乎於是卜地於所居之東營祠堂三閒其制度一倣  
朱子家禮締構精密面勢宏敞足以妥祖考之神靈起  
人子之敬心而攸繫重矣維石恐嗣人不知勦始之難  
所繫之重而怠於修理因請記其事於石并刻祭田祭  
器之數於石之陰以垂示久遠余知維石幼沖失怙獨  
與母居撐拄門戶與世酬酢雖日不暇給而子職之供

未始或違自奉甚菲薄而賓祭必精潔豐備非篤於孝  
敬能若是乎吁有奉先之實斯有奉先之具人之事親  
自始至終克盡孝敬者奉先之實也其營祠堂立祭田  
祭器者奉先之具也有其實而無其具者亦有之今維  
石兄弟既有其實而奉先之具又完且美矣其報本反  
始之心尊祖敬宗之意爲何如耶余於是重有感焉世  
之營宮室者峻宇華櫨雖法制有不當爲亦悍然不顧  
而祖考神主或置之於尋丈之室或栖之於咫尺之棚  
題字積塵漫不加省抑獨何心聞維石之風寧不媿於  
心耶余嘉維石有孝敬之實故不辭而爲之記後之隨  
者能以維石之心爲心繼述而不忘不惟祠宇常修飾

田常關而器常新將必開拓充廣益有以觀德者矣尙何荒頓毀壞之足慮哉趙氏子孫宜有感於斯文

忠愍陳克庵先生選

明史列傳陳選字士賢臨海人父員韜宣德五年進士爲御史出按四川黜貪獎廉雪死囚四十餘人正統末大軍征鄧茂七往撫其民釋被誣爲賊者千餘家都指揮蔣貴要所部賄都督范雄病不能治軍皆劾罷之歷廣東右參政福建右布政使廣東值黃蕭養亂後而福建亦寇盜甫息員韜所至拊循教養得士民心選自幼端慤寡言笑以聖賢自期天順四年會試第一成進士授御史巡按江西盡黜貪殘吏時人語曰前有韓雍後

有陳選廣寇流入贛州奏聞不待報遣兵平之憲宗卽位嘗劾尙書馬昂侍郎吳復鴻臚卿齊政救修撰羅倫學士倪謙錢溥言雖不盡行一時憚其風采已督學南畿頒冠婚祭射儀於學宮令諸生以時肄之作小學集注以教諸生按部常止宿學宮夜巡兩廡察諸生誦讀除試牘糊名之陋曰已不自信何以信於人成化六年遷河南副使尋改督學政立教如南畿汪直出巡都御史以下皆拜謁選獨長揖直問何官選曰提學副使直曰大於都御史耶選曰提學何可比都御史但忝人師不敢自詘辱選詞氣嚴正而諸生亦羣集署外直氣懾好語遣之久之進按察使決遣輕繫數百人重囚多所

平反囹圄爲空治尙簡易獨於贓吏無所假然受賂百金以上者坐六七鑲而止或問之曰姦人惜財亦惜命若盡挈所賂以貨要人卽法撓矣歷廣東左右布政使肇慶大水不待報輒發粟振之二十一年詔減省貢獻而市舶中官韋眷奏乞均徭戶六十人添辦方物選持詔書爭帝命與其半眷由是怒選番人馬力麻詭稱蘇門答刺使臣欲入貢私市易眷利其厚賄將許之選立逐之去撒馬兒罕使者自甘肅貢獅子將取道廣東浮海歸云欲往滿喇加更市以進選疏言不可許恐遺笑外番輕中國帝納其言而眷憾選甚先是番禺知縣高瑤沒眷通番資鉅萬選移檄獎之且聞於朝至是眷誣

奏選瑤朋比爲貪墨詔遣刑部員外郎李行會巡按御史徐同愛訊之選有所黜吏張襲眷意其怨選引令誣證選襲堅不從執襲拷掠無異辭行同愛畏眷竟坐選如眷奏與瑤俱被徵士民數萬號泣遮留使者辟除乃得出至南昌病作行阻其醫藥竟卒年五十八編修張元禎爲選治喪殮之襲聞選死哀悼乃上書曰臣聞口能鑠金毀足銷骨竊見故罪人選抱孤忠子處羣邪之中獨立眾憎之地太監眷通番敗露知縣瑤按法持之選移文獎勵以激貪懦固賢監司事也都御史朱旻及同愛怯勢養姦致眷橫行胸臆穢蟻清流勘官行頤指煅鍊竟無左證臣本小吏詿誤觸法被選黜罷實臣自



取眷意臣憾選厚賂噉臣臣雖胥役敢昧素心眷知臣不可誘噉行等逮臣致理拷掠彌月臣忍死籲天終無異口行等乃依傍眷語文致其詞劾選勘災不實擅便發倉曲庇屬官意圖報謝必如所云是毀其姜爲夏姬詬伯夷爲莊騶也頃年嶺外地震水溢漂民廬舍屬郡交牒報災老弱引領待哺而撫按藩臬若罔聞知選獨抱隱憂食不下咽謂展轉行勘則民命垂絕所以便宜議振志在救民非有他也選故剛正不堪屈辱憤懣旬日嬰疾而殂行幸其殞身阻其醫療訖命之日密走報眷小人佞毒一至於此臣擯黜罪人秉耒田野百無所圖誠痛忠良銜屈而爲聖朝累也不報員韜父子皆持

操甚潔而員韜量能容物選務克己因自號克庵遇物亦稍峻人謂員韜德性四時皆備選得其秋焉嘗割田百四十畝贍其族人暨卒族人以選子戴貧還之戴不可而止宏治初主事林沂疏雪選冤詔復官禮葬正德中追贈光祿卿諡忠愍

贊曰陳選冤死爲可哀讀張褫書又以見公正之服人者至而直道之終不泯也

廣東通志名宦陳選字士賢臨海人明禮經天順庚辰試禮部學士邱濬讀其文喜曰此必古君子也力置第一後爲御史所至有聲累遷廣東左布政雅澹無異韋布每飯蔬羹除重徭罷和買備賑濟爲惠養計事涉風

教必捐俸爲之務以德化民其聽訟不事刑威隸人拱立左右而已訟者使自拘被訟者使自歸民樂其不擾皆不忍欺數辨冤獄閩漁人賴克哥等三十餘舟遭風泊潮邏者得之以通番論死選讞出之邑人劉馬住及黃福等十九人被誣選一訊得實人服其神執法不避中貴時提督市舶司韋眷倚進貢爲姦利以苦役戶選特爲裁減其後番人馬力麻與海商通販詭稱蘇門答刺國眷受賄不問選發其僞又撒馬兒罕使臣怕六灣以獅子入貢泊浮海還國復以更市獅子陷我選言不貴遠物豈以隳國體而勞外番眷益銜之乃誣奏選勘災不實擅便發倉命刑部員外李行會巡按御史勘問

無實行承眷頤指賂選所黜吏張褻誣證其狀褻不從  
遂拷掠褻務文致之逮選赴京廣人擁留數千至有泣  
下者選在道病作行至南昌卒後以張褻疏奏得白贈  
光祿寺卿諡恭愍而眷竟罷鎮守選性約素其學以古  
人爲宗臨利害不能奪其治行至今爲嶺南所稱

葉良佩名臣五公傳陳公諱選字士賢臨海人方伯員  
韜之仲子也正統庚辰中會試第一遂登進士第歷官  
御史提學副使按察使終廣東左布政使近世稱名節  
之士必以歸之始公之出按江西也風紀大振雖不以  
刑罰立威而官吏相戒自不敢犯憲皇嗣位公上疏力  
請追復直諫之士劾去大臣倖進者數人尋命提學南

畿子視諸生愍學者競爲浮華之文欲變其習乃於學宮立困學館每巡歷至則居宿困館默然端坐以身爲教又令讀小學書暇則習禮一時諸生皆翕然感化遷河南提學副使其爲教大率如南畿進按察使剗革宿弊殆盡卽同官亦竦然加謹畏尋以憂去士民爲立去思祠服除擢廣東右布政使踰年轉左使廣民疲困公爲除徭役罷和買備賑濟皆務爲安養計獨摧抑貴倖勇不顧利害竟以是得禍中官有弟冒爲武職者偪娶妾婦公爲奪還之而寘武職於法有提督市舶司者緣進貢爲姦利公每禁抑之乃誣奏公他事當路不察竟逮公赴京廣人數萬號泣擁留之弗能得行至南安以

疾卒學士張東白爲治斂具歸其喪且表其墓曰公有天下不可奪之大節有足以濟天下之大才有不可遏於天下之大勇士林以爲知言公自號克庵立志以古聖賢自期待嘗注文公小學及序宋史道學傳皆行於世正德中用言官奏追贈光祿卿諡恭愍

兩浙名賢錄陳選字士賢臨海人自少潛修獨詣不求人知惟以古聖賢爲志天順庚辰試禮部嶺南邱潛得其文曰此古君子也置第一及相見而貌不揚潛曰吾聞荀卿云聖賢無相將無是乎授監察御史出按江西風紀大振布按長貳謁每易素服以入選曰此非憲綱體也人臣覲君服必視其品顧獨殺於御史乎於是皆

動色相戒不敢犯已督學南畿校士一以德行為本試  
卷明列諸生姓名不爲糊封曰吾且不自信何以信於  
人耶至誠相臨無不感動條冠祭射儀令諸生以時肄  
之每按部就止學宮徐行審觀周旋磬折弦歌俎豆古  
風郁然前後三載變色之言不施於衿佩而成就興起  
至不可縷數遷河南兵備副使尋改提學中州學者咸  
慶得師會倖奄汪直被命巡郡國都御史以下咸匍匐  
趨拜選獨長揖直怒曰爾何官敢爾選曰提學直愈怒  
曰卽提學寧大於都御史耶選曰提學非都御史比但  
宗主斯文爲世表率雖死不可屈節直見選詞氣嚴正  
舉止安舒而諸生具集署外不可犯遂改容曰先生無

公務相關自後不必來選徐步而出尋轉按察使擢廣  
東布政使時嶺南市舶太監韋眷專恣培植勒富民供  
辦選奏減其數眷復縱黨通番番禺知縣高瑤發其贓  
鉅萬都御史宋旻不敢詰選獨移文獎瑤眷深銜之知  
中官咸疾選乃誣摭選黨比高瑤和同貪墨上怒遣刑  
部郎李行會巡按御史徐同愛鞠之行同愛畏眷不敢  
反異復賂選所黜吏張褰令誣質選褰不從行等阿眷  
執褰拷掠褰曰死卽死耳安敢以私憾滅公義陷正人  
也行等羅織無所得乃誣選矯制發粟曲庇屬官罪當  
徒奏入詔奪選官遣錦衣逮選士民數萬人號泣遮留  
以衛士辟除始得出省城至南昌疾作卒於石亭寺時



年五十八友人張元禎斂以疏綌或咎其薄元禎曰公  
平生清苦斂以時服公志也張裝乃上言臣聞周公元  
聖而四國之謗乃致上疑於其君曾參大賢而三至之  
言不免近惑於其母豈成王之不明參母之不親哉凡  
以目可鑠金而毀可銷骨也陛下明並日月恩同父母  
詎圖怙冒之中尙懼屈抑覆盆之下復有沈冤竊見廣  
東布政使陳選少崇正學夙抱孤忠子處羣小之閒獨  
立眾憎之地太監韋眷通番敗露知縣高瑤按法持之  
選移文嘉獎以激貪懦固監司之體也奈何宋旻徐同  
愛怯勢保姦首鼠兩覬以致眷橫行胸臆污蟻清節煢  
惑聖明勘官李行承眷頤指鍛鍊成獄竟無左驗臣本

小吏以註誤觸法爲選罷黜實臣自取眷妄意臣必憾  
選以厚賂啖臣令扶同陷選臣雖胥徒安敢欺昧心術  
顛倒是非眷旣知臣不可利誘乃嗾行等逮臣於理彌  
日考掠身無完膚臣甘死籲天終無異口行等乃依傍  
眷語文致其詞劾選勘災不實擅便發倉曲庇屬官意  
圖報謝是毀其妻爲夏姬詎夷齊爲盜跖也頃年嶺外  
地震水溢漂民廬舍屬郡交牒報災老幼引領待哺而  
撫按藩臬若罔聞知選獨抱隱憂食不下咽謂展轉行  
勘則民命垂絕所以便宜議賑志在救民非有他也選  
素剛正不堪屈辱乃爲勘官凌侮憤懣成疾旬日而殂  
李行幸其就死不爲醫療又遣養子密報選死於眷以

快其憤宵人佞毒一至於斯司寇之屬要在詰姦刑暴  
安取此輩爲也夫選砥節奉公橫罹讒構君門萬里孰  
諒其冤臣以罪人擯斥田野秉耒自給百無所圖敢冒  
死披陳甘心鼎鑊者誠痛忠廉銜屈抑之冤長讒佞之  
姦爲聖明之累也奏入不報第以他事罷眷鎮守宏治  
初工部主事莆田林沂疏雪選冤詔復官禮葬正德中  
追贈光祿卿諡恭愍初選倣范文正公置田百四十畝  
祀先周族名思遠莊迨卒族以選貧甚舉田還其子戴  
戴不可曰先人行義戴取而私之獨不媿乎人謂選有  
子云

明儒學案陳選字士賢台之臨海人天順庚辰試禮部

邱文莊得其文曰古君子也寘第一及相見而貌不揚  
文莊曰吾聞荀卿云聖賢無相將無是乎授監察御史  
羅一峰論奪情被謫先生抗疏直之出按江西藩臬以  
素服入見先生曰非也人臣覲君服視其品殺於御史  
何居不事風裁而貪墨望風解綬已督學南畿一以德  
行爲主試卷列諸生姓名不爲彌封曰吾且不自信何  
以信於人邪每按部就止學宮諸生分房誦讀入夜鐙  
火熒然先生以兩燭前導周行學舍課其勤惰士風爲  
之一變成化必改中州提學倖奄汪直巡視郡國都御  
史以下咸匍匐趨拜先生獨長揖直怒曰爾何官敢爾  
先生曰提學愈怒曰提學寧大於都御史邪先生曰提

學宗主斯文爲士子表率不可與都御史比直既懾其  
氣岸又諸生集門外知不可犯改容謝曰先生無公務  
相關自後不必來先生徐步而出轉按察使歸奔母喪  
喪畢除廣東布政使肇慶大水先生上災傷狀不待報  
輒發粟賑之市舶奄韋眷橫甚番禺知縣高瑤發其贓  
鉅萬都御史宋旻不敢詰先生移文獎瑤眷深憾之番  
人質貨詭稱貢使發其僞逐之外使將市狻猊入貢又  
上疏止之皆眷之所不利者也眷乃誣先生黨比屬官  
上怒遣刑部員外郎李行會巡按御史徐同愛其鞫兩  
人欲文致之謂吏張褰者先生所黜必恨先生使之爲  
誣褰曰死卽死耳不敢以私恨陷正人也爰書入詔錦

衣官逮問士民數萬人夾舟而哭至南昌疾作卒於石  
亭寺年五十八友人張元禎殮以疏綌或咎其薄元禎  
曰公生平清苦殮以時服公志也張褻乃上言臣本小  
吏以註誤觸法爲選罷黜實臣自取眷妄意臣必憾選  
以厚賄陷臣令拏以脩選臣雖胥徒安敢欺昧心術顛  
倒是非眷知臣不可利誘嫉行等逮臣於理彌日拷掠  
身無完膚臣甘罪籲天終無異口行等乃依傍眷語以  
欺天聽選剛不受辱旬日而殂君門萬里孰諒其冤臣  
以罪人擯斥田野百無所圖敢冒死鼎鑊者誠痛忠廉  
之士銜屈抑之冤長讒佞之姦爲聖明之累也奏入不  
報第以他事罷眷鎮守正德中追贈光祿寺卿諡恭愍

先生嘗以易教授生徒晚而居官論易專主傳義一無異同以克己求仁爲進修之要故自號克庵讀書不資爲文辭手錄格言爲力行之助每上疏必屏居齋沐引使者於庭再拜而遣子劉子曰由張東白之事觀之非平日安貧守道之意徹乎表裏安能使朋友信之如是由張襲之事觀之非在官賞罰黜陟出乎至公安能使黜吏化之如是吾有以見先生存誠之學矣

師說愚按先生躬行粹潔卓然聖人之徒無疑其平生學力盡見於張襲一疏至誠而不動者未之有也通紀評理學未必盡當而推許老先生也至矣嗚呼肅好古信道真不媿先生友者

文肅先生鄉友  
謝公鐸鳴治

儒林錄陳克庵先生名選字士賢浙江臨海人少沈靜  
端慤不妄言笑天順四年試禮部考官邱文莊讀其文  
力置第一曰必古君子也及見貌頗不揚文莊益喜曰  
聖賢不相既成進士授監察御史出按江西藩臬以素  
服入見先生曰非也人臣覲君服視其品殺從學案補於御  
吏何居不事風裁而貪墨望風解綬成化初修撰羅倫  
謫官先生獨疏申救學士倪謙自戍所得復陞爲禮部  
侍郎抗章極論之復劾奏兵部尙書馬昂及諸大臣之  
不職者既改提學南京先頒冠祭射儀於學宮歲時肄  
習既至徐行諦視周旋磬折絃管豆登洋洋翼翼遂居  
宿學宮中夜則以二燭前導巡行誦讀兩廡燈火熒然



吾伊不絕士風爲之一變先生教人必本小學灑埽應對逮於六經以及通書西銘皇極經世太極圖其自爲禮卽東西階舉足先後造次不爽除卷牘糊名之舊曰已不自信奈何信人提學三年變色之語不見於章縫折箠之笞不加於輿阜而人畏如神明遷河南按察副使尋改河南提學汪直被命出巡都御史以下跪伏趨拜先生獨長揖直曰君何官耶先生曰提學副使直曰能大於都御史耶先生曰提學何可比都御史業忝人師不敢先自詘辱直旣懾其詞氣又諸生從者儼集署外知不可犯改容謝曰先生公務旣無相涉後不必來先生徐步而出八年轉按察使仍河南首釋淹囚除罷

諸幣名舊規者其爲政一從簡易顧獨於賦吏無所貸  
寬聞母喪還士民泣送立祠服除擢廣東右布政踰年  
轉左先生在官坐堂上令輿隸別之閒處分治生業不  
廢使令民告狀者予一票令持示所告家使自來詣立

鼓

原作

道道振鐸以徇社村子弟擇鄉祭酒長者主教

嶺南苦鎮守中官瓊儋騷然先生嚴條約革和買減泛  
役掌市舶太監韋眷措剋供辦奏乞均徭餘戶添采方  
物先生因詔書減省貢獻請悉停罷雖不盡行亦得減  
半番禺知縣高瑤發眷造私船通番沒其貨鉅萬都御  
史宋旻等皆不敢詰先生移文獎瑤眷深憾之番人買  
貨詭稱貢使先生發其僞逐去外使將市狻猊入貢又

上疏止之是年嶺外地震水溢撫按藩臬殊不涉心先生從便宜發倉賑民眷因累舉前事奏先生黨比屬官和同貪墨發倉擅賑希望侵欺朝命遣刑部員外郎李行會巡按御史徐同愛共鞠同愛畏眷不敢反異謂先生有黜吏張爰意其必怨偪令誣證爰堅不從同愛執爰拷掠數百乃枉判奏入詔錦衣官逮繫士民數萬人夾舟而哭逮至南昌病發行阻其醫藥竟卒於石亭寺年五十八行復使其養子密報眷曰陳選死矣時南昌友人張元禎殮以疏給曰陳公清儉絕眾殮以時服於是爲宜而張爰同逮至京深痛忠良銜屈從獄中上書按張爰上書云臣擯斥罪餘乘未田野百無不報第以所圖是爰未嘗同逮書亦非從獄中上也

他事罷眷鎮守先生平日自待古聖賢其學以克己求  
仁爲要因自號克庵讀書潛修嘿會不求人知燕會惟  
服先人故衣帶客至瓦器蔬食相對無媿色自河南奔  
喪還牛車一輛之官廣東騎驢出都門而提學南京時  
韓雍家居亦自減其騶從宏治初工部主事林沂上疏  
雪先生冤詔復官禮葬之正德中追贈光祿卿諡忠愍  
評論

惟公立朝方嚴寡儔君子是親小人是讐育才如春持  
憲如秋小學有注公取並收尤邃於禮孜孜講求橫渠  
之學入門所由抑孰如公聞然日修

楊廉  
撰贊

先生倣范文正公置田一百四十畝以充祀先嗣族之

用號思遠莊及卒族人以公無餘資舉田還公子戴戴不可曰先人行義戴取而私之獨無媿乎人咸謂先生

有子

辛全記

台學源流陳克庵名選字士賢臨海人父員韜巡按福建辯活沙寇之脅從者數萬人官終右布政使先生自少有文名比長篤志聖賢之學以克己求仁爲要讀書不資文詞遇格言卽手錄於冊爲力行之助天順庚辰上春官遂魁天下初爲御史一疏奪二學士之命再疏移太司馬之權天下已凜然仰其丰采謂質鐵面不可犯也及督學南畿敷德屏威日與諸生講明正學謂聖人之道必自小學始特注釋以頒賜使學者知所從入

每巡歷減騶從刻日期居止學宮談經習禮時或同膳  
餽若家人焉諸生翕然咸服兩地士氣聿爲之變轉河  
南按察使尋以憂歸服闋擢廣東左布政使猶眷眷舊  
徒刻宋史道學傳以遺之廣民困於苛政爲革宿弊抑  
權倖殫力拯援與市舶中官不協竟爲誣奏卒於途年  
五十有八士大夫識與不識莫不冤之先生剛果自持  
勤儉成性居常謙謙言若不出口至臨大事決大議則  
屹然萬夫之勇不能奪之旣歷貴顯惟服先人故袍帶  
客至瓦盂蔬食相對無慚色自河南憂歸行李蕭然車  
一輛而已及之廣東騎驢出都門其清約有寒士所不  
及者俸餘則以置義田周宗族之困餓者焉張侍郎元

頑表其墓稱先生有不可奪之大節有足以濟天下之大才有不遏於天下之大勇識者以爲名言毛給事中憲請於朝贈光祿卿謚恭愍羅守僑奏立祠祀之

廣東左布政使陳君墓志銘

謝鐸撰

桃谿淨稟

成化丙午夏五月廣東左布政使臨海陳君士賢卒於江西之南昌南昌太史張先生廷祥以禮殮歸其喪且抵余書將表其墓而俾爲之志余執書爲位哭明日吾友通政黃君世顯復以書俾其子戴來速銘嗚呼君天下士也其赫赫不可蓋者固不繫銘之有無獨念君故知我者重以二公大義要責其奚敢辭初君之在廣東也權貴人有據市舶餘戶假貢獻通私番以毒民蠹國

者君連三疏抗折之遂誣罔君賴上聖明不卽罪然卒  
從吏議將逮君詔獄民老稚號泣遮道以從者動千億  
計有故吏張褫嘗爲君所黜至是權貴人鉤致之將并  
中君張顥廷疏訟君冤君雖不幸死道上然天下益以  
是壯君且信其得民之深有如此者而一時貪冒患得  
以傳成其獄者聞茲吏之風亦可以少媿矣始君之爲  
御史也上方厲精開言路諸在言責者爭拾苛細以自  
售君獨抗疏請追復直言之士并斥大臣之將柄用者  
且曰君子小人之進退否泰關焉一時風采獨楊御史  
琅與之抗君子謂其憂治世而危明主也蓋如是雖其  
言不盡行然天下自是始畏公議而進者沮矣暨其出



而提學南直隸河南也念學政久廢士之務浮棄實者  
比比而是所至必先使之習小學而後及科舉之業立  
困學館至則居宿以身爲教仍下冠昏祭儀俾諸生習  
焉旣至廣猶特刻道學傳以詔之蓋至今稱提學之善  
於其職者舍君亦無與歸君厯官先後幾三十年服食  
居室無所增嘗呼其子謂曰吾藉祖宗慶官二品祿入  
之產汝何可獨享其分十之六爲思遠莊以祀祖先周  
宗族其克己爲義尤君子所難於是益足以見君生平  
之大節不誣矣於乎君固天下之士也而止於斯吾安  
得不爲天下惜哉君諱選別號克庵士賢其字也陳氏  
本宋國子司業左輔之後由婺徙台之仙居再徙而爲

臨海曾祖濬圭號鈍靜祖泰生贈監察御史父諱員韶  
景泰初仕至福建右布政嘗活沙尤盜之脅從者數萬  
人民至今德焉母金氏累贈夫人繼母沈封夫人配王  
封孺人繼張子男四長蒲次翼俱郡學生早卒次戴次  
□女二孫女一俱幼戴將以年月日葬君八疊山之原  
君學博而深於經詞章非其所好嘗從翰林檢討逸庵  
陳先生游先生深器之以禮經領景泰庚午鄉薦天順  
庚辰會試第一人歷御史按察四轉以至今官生宣德  
己酉享年五十有八而已有丹崖集若干卷藏於家君  
性內剛外柔居常謙謙言若不出口至其臨大事決大  
義則屹然萬夫之勇而卒莫之奪吾嘗求古節槩之士

得一人曰君其陽道州乎道州爲諫議且七年始一論  
裴延齡陸贄事君爲御史三年耳而剴切論諫急於其  
職乃若是道州爲司業日與諸生親宜其罔不率教者  
君徧歷徐揚冀豫之域而教澤所至亦無不及焉道州  
爲刺史自以追科政拙不奉侏儒之貢君力障五嶺之  
民忤權姦以至於死嗚呼凡若是者君子謂視道州難  
而功倍非耶君之行不止是輒敢取其大者以銘庶天  
下後世之欲知君者得以攷焉銘曰

深文傳比訐私拾細臺史法吏歲課月論棄根掇芸提  
學校文國肥民瘠下損上益轉運方伯世方競趨我絕  
不窺世所不爲我勇赴之嗚呼士賢而止於斯吾安得

不爲斯世而悲

廣東左布政使陳公墓表

南昌張元禎廷祥撰

赤城

嗚呼此吾友陳公士賢之墓公有天下不可斂之大節  
有足以濟天下之大才有不可遏於天下之大勇國家  
承平日久士夫多厭厭無氣節閒有之而檢身之功或  
歉焉故其發之也不耀而其持之也不恆如吾士賢則  
何可議哉何可議哉公諱選士賢其字別號克庵世家  
臨海由鄉薦同吾第庚辰進士試禮闈時爲第一人筮  
仕監察御史巡江西理河南山西湖廣福建四道及三  
法司事出督學政於南畿陞河南按察司副使初治軍  
政繼仍命督學未幾轉按察使太夫人卒服除陞廣東

右布政使亦未幾轉左布政使公爲御史正色直言不知權貴尤嚴於君子小人之進退時有二儒臣將援倖闖以柄用者公力擊之得不進修撰羅倫以論時宰奪情謫官公抗章留之不報其督學也正己以範物日與諸生講明聖賢正學丁甯以務實近裏毋徒辭章口耳之事兩地士風聿爲之變長憲命下立辯釋死獄數百貪酷吏爲當道所親知者百餘輩悉斥去不兩月眾弊一清幸闔有廣東人勢熏灼甚在京嘗來謁不與見其弟豪占嫖婦之居甫下車亟敎還之市舶之闖肆虐嶺表諸司素無敢何公獨不少徇闔因誣公數事詔使臨覆之無一可以緇公者在廣敷德意卹民隱更張弊政

惟日不足冤抑之平反者亡慮數百蘇門答刺國入貢  
供費當鉅萬撒馬兒罕使臣欲航滿刺加市獅子以獻  
公具疏民貧不堪擾且謂翫野獸恐貽笑外番俱請卻  
之公福建右布政使員韜先生之仲子自幼沈毅寡言  
笑嘗從游檢討陳先生璣之門其學粹然一出於正其  
操履恪然一出於誠其居此官卽欲盡此職其行此事  
卽欲盡此心其視去就升沈甚輕心一在於生靈國家  
餘不恤也宦轍所至無不感動響應者巡江西江西人  
到今萬口一辭稱頌爲名御史南畿河南繼公提學者  
屢矣然切切感慕者惟公以憂去河南士民遮道泣送  
者萬計復相率立生祠及去思碑被闖誣時兵民數萬

填溢衢巷號訴於詔使多涕泣者闔復以賂喉公所黜  
吏張駭者證公吏死不從公名滿天下天下士夫無問  
識不識論一時正臣必僉曰陳某陳某都風紀者或乏  
必僉曰此非陳某不可典銓衡者或非其人必僉曰此  
非踰陳某者公厯官垂三十年俸餘悉以置思遠莊祀  
其祖及賜其族人更無贏資寄死於吾南昌無以殮  
吾與閔都憲珪侯方伯英及其鄉人王國賓永壽應王  
相璧共賻之柩歸復無以葬浙憲使戴君珊更檄其郡  
邑資焉卒成化丙午三月二十一日距其生宣德己酉  
十一月二十八日享年五十八葬於明年正月一日地  
曰八疊山母金贈夫人繼母沈太夫人配王封孺人繼

配張子男三藩翼戴女二孫男三恪協惓女一公之卒  
吾南昌也將易簀氣絲絲語予曰死能遺我以不隨世  
磨滅者惟子子吾知友中惟知我也久且深嗚呼公之  
卒識者痛哭聞者痛心公之風聲氣概足以震動乎一  
世益深乎其植煥乎其發非彼不本諸其躬者士習得  
公而人以端士氣得公而人以振積益久將所漸者益  
深陟益峻將所被者益溥顧位僅如是而壽僅如是悲  
夫茲豈公之不幸實吾人之不幸世道之不幸也謹披  
淚而表諸墓上之石

重修丹崖書院記

臨海金賁亨汝白撰

一所集二

丹崖書院陳恭愍先生昔所藏修以薰及其家若邦之



子弟者也先生沒有司暨邦人遂卽而俎豆焉旣而毛  
給事憲請於朝錫諡建祠郡守羅侯僑爰拓故址崇構  
維新顧侯璘李侯金各置祀田若干嘉靖丙申柱史張  
公按浙屬今守許侯繼判駕林侯鏢相厥垣宇而敦緝  
之益廢剝田三十畝以優及其子孫與上蔡書院一時  
聿興邦人大悅書院故未有記判府以屬賁亨義不敢  
辭維丹崖在郡城西北峭峻絕塵下連闌闌如處深谷  
曉光相映春色隱然外障大江壁立如斬前則兩峰駢  
起煙霞閒如端人碩士氣味攸同而相對無言者也先  
生擇而居之夫亦有契於其中與先生少承若考勿齋  
公家學而復游逸庵陳公之門葢已知所向方及大魁

天下友四方豪傑若南昌張東白永豐羅一峰長洲吳  
匏庵暨吾台黃定軒謝方石諸先生者率礪名節而期  
進於聖賢之道先生尤以勇任之見義疾趨若臨崇岡  
而轉巨石莫當其前莫掣其後其在臺察謂君子小人  
進退繫治忽乃力請追復直言之士而廷劾大臣倖進  
者數人於是異趨者肅然憚之其在督學易嚴以和子  
視書生身代條約恭儉之風不言而信嘗立困學館於  
學宮爲巡歷攸止俾易以親不覺化之入也其在廉訪  
如臺察在旬宣如督學而風裁益以張惠澤益以遠矣  
卒忤權貴邁議以終先生所安而天下惜之昔吾夫子  
嘗歎未見剛者然則先生非其人與設當其時受鏃羽

之訓焉殆未知其所止何如也嗟乎先生去豫逾五十年而柱史之所以崇慕振作若有所固結於中而不能解者如此是故由今以觀昔可以知豫士知南畿知廣東矣矧生於先生之鄉而顧莫知所興起矣乎賁亨於茲重有感焉柱史名景豫之汝陽人

遺書

孝經集注一卷

存

小學集注六卷

存

冠祭禮儀注

佚

重刊宋史道學傳

書刻小學句讀後

蔡雲程

鶴田草堂集八

文公小學一書流布宇內家傳人誦久矣許魯齋氏謂  
吾信之如神明敬之如父母亶乎非誣人之言也滇僻  
處南徼其他載籍略具獨此書闕而弗講余竊患之乃  
以所攜克庵陳先生句讀二冊稍加校正授大理郡邑  
刻之學宮以溥其傳庶俾文公並克庵之教徧行遐域  
豈惟蒙稚是賴固將庠校之士所宜俛首受讀以植嚮  
往之基者也詩曰肆成人有德小子有造余雖謏薄是  
心也不有同然者乎刻成敬識於末簡

遺詩

懷人

空階凝曉霜落葉寒擁壁當此授衣時念彼遠行客客

行日已遠我帶日以緩登高望歸舟鳥去煙波晚入門  
藉衾坐沈吟淚盈把豈無一斗酒淒涼爲誰寫

歎友

車行一輪摧鳥飛一羽戕人生失其友出入誰扶將相  
逢豈無人不如子獨良朝游羣英林夕棄萬鬼鄉春風  
吹南國宿草萋且長招君魂不歸割我欲斷腸豈不悟  
生滅至情悽難忘

贈陳大參用璣致政歸里用璣子家君門人復同官閩  
藩

之子命世才早貫金閨籍矯矯冰雪姿亭亭鸞鳳翼傳  
家一畝畝藝蘭翦繁棘宿抱一寸丹君民耿胸臆握符

靖邊城再奠三山城云何當急流忽動葦鱸憶緣知厭  
世塵早謝危途軾家園白日長高齋恣眠食悠悠幘下  
江垂綸對鷓鴣我昔趨庭時連牀倒文墨閩南一樹棠  
復共吾翁植念茲奕世交同心更同德我慚逐世華向  
道苦不力羨君早拂衣天涯復顏色何當遂洛盟詩成  
動悽惻

東坡笠屐圖

城南白日魍魎繁遠徙又化南溟鯤竹刺藤梢歸路晚  
濛濛霧雨天欲昏天涯禹跡不到處要使舊輦留新痕  
荷笠俄成牧羊叟誰憐海上屬國孫襄童怪笑接離倒  
蜀犬驚吠扶桑暎先生招怪每如此白首幸免長鯨吞

何人好事貌遺像風流不減乘珠幡此翁本是天上仙  
當時暫墮塵網閒我從象外得真相神交心醉俱忘言  
贈吳人作字

昔聞汝祖東吳英醉傳草聖令人驚汝今能飲不滿杯  
逸氣欲與相崢嶸興來把筆如把槊生絹揮灑悲風生  
勢挾大澤雷雨過聲聞三峽波濤傾游絲颺颺捲清晝  
高斗落落迴寒更自言靜中觀妙理故能變化窮其精  
嗟余早年學不就塵滿硯田長不耕覽時撫事增感慨  
胸中帆律何由平空齋咄咄作怪語吟聲咿唔飢腸鳴  
詩成請君爲我寫墨池灑壁從奔騰是時黃雲散歲暮  
返照忽出寒江明手隨意去不聞語聲似突騎陰山行

令嚴不用響戈甲銜枚午夜登元冥安得師行亦如此  
坐見埽蕩妖氛清嗚呼作歌聊贈汝不覺流涕沾衣纓  
三台詩錄曰陰山曰北冥顯指當時小王子入寇及  
陳鉞掩殺冒功激變汪直行邊張皇等事

雨阻

沙響聞雨來淒然生旅愁遙尋晚林磬暫駐寒塘舟窗

下一僧老林閒諸鳥幽誰言阻遠者翻使得佳游

三台詩錄

首句來字  
當改至字

自敘

與世相違便陸沈晚年風味在書林一從沂水春風樂  
千古寒潭秋月心濟世未忘三事位讀書猶惜一分陰



得閒莫浪嬉游過太華山高滄海深

被逮寄王大韶年兄

南海飛霜六月高孤臣萬里帝闈遙自憐鮑叔能知我一命從來等羽毛

遺文

重刊宋史道學傳後序

三台文獻十

選昔爲憲臣承上命總學政於徐揚冀豫之域得與諸賢游日以聖人之道相講明將反之以修身而致用選未之逮也而諸賢咸知鄉方有遠到之勢焉離索以來睠懷昔游寤寐不忘特刻宋史道學一傳冀以資進學於乎尙深攷程朱師友之淵源求至乎聖人之道哉小

用則善一家大用則善天下幸毋以己知己能者爲已  
至也傳序謂程朱正傳以格物致知爲先明善誠身爲  
要其言可疑夫明善則格物致知之功誠身則誠意正  
心修身之效非格物致知之後復明善誠身以爲要也  
聖人之道純粹至善之理而已矣理蘊於心而形於事  
人多昧焉而不能全之程朱之學以敬爲本敬所以凝  
是理於身心使其常明焉而不昏塞常全焉而無欠缺  
也豈惟程朱乎孔門之教固然矣主敬以格物致知卽  
孟子求放心以學問也主敬以誠意正心修身卽論語  
修己以敬也靜而主於敬中庸之戒謹不睹恐懼不聞  
以致其中也動而主於敬中庸之慎獨以致其和也蓋

學問所以窮是理修己所以踐是理中指理之在於心和指理之在於事故爲學而主於敬則心常惺惺而存心存則纖毫之私不留

原作著不得

而萬理自森昭於日用

動靜之間以知則明而通以行則正而固矣敬也者其聖學始終之要與敬齋箴曰不東以西不南以北當事而存靡他其適者言執事時敬如此弗貳以二弗參以三惟精惟一萬變是監者言操心時敬如此須臾有閒私欲萬端不火而熱不冰而寒者戒夫不能敬以存養之毫釐有差天壤易處三綱旣淪九法亦斁者戒夫不能敬以省察之此則持敬用力之方也雖使孔孟復生與學者語亦無以易此世之名士者孰不祖孔孟而宗

程朱及考其所學多役志於文字之間否則冥心於虛寂之境殊與程朱不相似嗚呼以如是之學而欲由夫道此與櫟行於南冥之壩而望至於恆嶽之顛者何異諸賢念哉學以敬爲要而日新不已道將爲爾有矣

小學句讀序

三台文獻計

昔二帝三王我朝一祖四宗之道統聖天子既承之憂士或遺實學而驚虛文無以贊道化也復慨然俞商相國之言詔天下士皆先從事於小學然後進乎大學於乎士不幸不逢時猶將違俗而學聖人之道以成其身幸而值乎今之世道化方盛有小學以成始有大學以成終有選舉之塗出而行所學以及人蓋亦思所以學

乎聖人之道人倫而已矣學之必自小學始子朱子小學一書其教在於明倫其要在於敬身蓋作聖之基也從事於斯豈惟止其辭而已耶讀明倫而知父子之親君臣之義夫婦之別長幼之序朋友之交必踐其事焉讀敬身而知學術之要威儀之則衣服之制飲食之節必嚴諸己焉及進乎大學格物致知則因吾已知者而究極之也誠意正心修身則因吾已行者而惇篤之也由是推之於家則家可齊推以贊化道則國可治天下可平故學聖人之道必自小學始否則雖欲勉焉以進乎大學猶作室而無基也成亦難矣況驚虛文乎夫爲學而不嚴諸己不踐其事誦說雖多辭章雖工皆空文

也於吾身何益哉於國家天下何補哉於聖人之道何  
所似哉選學也晚道未知聞以奉詔來總中州教周旋  
多士閒有一朝之義故敢句讀是書相與講而行之期  
底于成以副聖天子作人之盛意

四書全書總目小學集注六卷宋朱子撰明陳選注是  
書凡內篇四曰立教曰明倫曰敬身曰稽古外篇二曰  
嘉言曰善行選注爲鄉塾訓課之計隨文衍義務取易  
解其說頗爲淺近然此書意主啟蒙本無深奧又雜取  
文集子史不盡聖言注釋者推衍支離務爲高論反以  
晦其本旨固不若選之所注猶有裨於初學矣

台學統卷三十三